

Expo 2015 a Milaun cun participaziun da la Svizra

■ (anr/ld) Tenor l'avis dal cussegl federal e dal parlament duai la Svizra sa participar a l'exposiziun da l'onn 2015 a Milaun. Il parlament ha lubì il credit necessari da var 23 milliuns francs. Dal prim da matg fin ils 31 d'october 2015 vegn organisà a Milaun ina exposiziun mundiala sut il motto: «Nutrir il planet. Energia per la vita». Felix Gutzwiller, il pledader da la cummissiun, ha fatg attent a las impurtantas relaziuns da la Svizra cun l'Italia, principalmain cun la Lombardia. Betg sulettamain la lingua taliana, mabain er multifaras relaziuns economicas e culturalas collian la Svizra cun quest pajais vischin. Passa 500 000 persunas da lingua taliana vivan en Svizra. L'Italia è in partenari da gronda muntada per l'economia e per il turissem, ha punctuà Gutzwiller.

Stefan Engler ha purtà en talian ils salids ils pli cordials da las quatter valladas da lingua taliana dal Grischun al nov elegì president dal cussegl dals chantuns, Filippo Lombardi, e fatg attent che ils quatter chantuns enturn

il Gottard – Grischun, Tessin, Uri e Vallais – sa participeschian a l'Expo 2015 a Milaun sco partenaris. Ins vul nizzegiar questa chaschun per intensiviar ils contacs cun noss vischins dal sid ed als preschentar nossas pussaivladads sin il sector da l'alimentaziun e da la perscrutaziun sin il sector da l'energia.

Cussegljer federal Didier Burkhalter vul profitar da l'Expo 2015 a Milaun per intensiviar e meglierar las relaziuns tranter la Svizra e l'Italia. Ina retscher-

tga haja demussà che noss vischins talians enconuschian meglier la Frantscha, la Spagna ed il Portugal che la Svizra. L'Expo a Milaun saja ina buna plattafurma per la Svizra da sa posizunar sco naziun attractiva, solidaria e neutrala. Burkhalter vul er nizzegiar la chaschun per schliar diversas dumondas fiscalas cun l'Italia. Senza opposiziun ha la chombra pitschna acceptà il credit da 23 milliuns francs. Quel duai vegnir reduci per var 8 milliuns francs tras sponsurs.

Talian en la chombra pitschna

Il cussegl dals chantuns ha elegì Filippo Lombardi (pcd/TI) sco ses nov president per 2012/2013. Lombardi che è adina puspè s'engaschè per la lingua taliana e per il respect da la terza Svizra è decidi da punctuar l'italianità cun manar las sesidas dal cussegl dals chantuns durant ses onn presidial en la lingua taliana. El haja fatg bunas

experientschas cun la terza lingua uffiziala gia sco vicepresidente. Il proceder general saja gea enconuschent a tut ils commembers. Sche quai fetschia da basegn vegnia el a far intginas explicaziuns en franzos u tudestg. Ch'el ha mess sin la glista da tractandas l'Expo 2015 a Milaun sco emprima fatschenta, è bain dapli che mo ina casualidad.